



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

15.09.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-ԷՍ-2017/35

ՀՀ գնումների բողոքարկման խորհուրդը (այսուհետ՝ նաև՝ Խորհուրդ) ուսումնասիրելով ՀՀ ֆինանսների նախարարության 22.08.2017թ. թիվ 03/26-3/15283-17 գրությամբ «Էդվարդ Քոմփյութերս» ՍՊԸ-ին (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգով (այսուհետ՝ նաև պաշտոնական ընթացակարգ) ներկայացված հիմքերը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ Ազգային Ժողովի (այսուհետ՝ նաև՝ Պատվիրատու) 17.08.2017թ. թիվ Ա-427 գրության հիման վրա, 22.08.2017թ. թիվ 03/26-3/15283-17 գրությամբ Խորհրդում նախաձեռնել է «Էդվարդ Քոմփյութերս» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ նաև՝ Ցուցակ) ներառելու նպատակով նախաձեռնված պաշտոնական ընթացակարգ:

2. ՀՀ Ազգային Ժողովի կողմից ներկայացված փաստարկները և դիրքորոշումը.

ՀՀ Ազգային Ժողովը 17.08.2017թ. թիվ Ա-427 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«ՀՀ Ազգային ժողովի կարիքների համար համակարգչային և պատճենահանման սարքավորումների ձեռքբերման նպատակով 2017թ. հուլիսի 25-ին հայտարարվել է «ՀՀ ԱԺ-ԳՀԱՊՁԲ-17/1» ծածկագրով գնման ընթացակարգ: Սույն թվականի օգոստոսի 2-ին բացման նիստում փաստաթղթերի ուսումնասիրության արդյունքում գնահատող հանձնաժողովը (այսուհետ նաև՝ հանձնաժողով) արձանագրեց մասնակիցների կողմից թույլ տված անհամապատասխանությունները (Հավելված 1 և Հավելված 3):

Կազմակերպություններին հանձնաժողովը առաջարկեց մեկ աշխատանքային օրվա ընթացքում շտկել անհամապատասխանությունները և ուղարկել հանձնաժողովի քարտուղարի էլեկտրոնային փոստին: Սակայն «Էդվարդ Քոմփյութերս» ՍՊԸ-ին Հավելված 1-ում հրավերով պահանջվել էր նշել գտնվելու և/կամ գրանցման հասցեն և հեռախոսահամարը:

Միաժամանակ հայտնում ենք, որ բոլոր մասնակիցներին արձանագրություններն ոչ ավտոմատ ծանուցմամբ ուղարկվել է www.armeps.am կայքի միջոցով:

Հիմք ընդունելով ՀՀ կառավարության 2017թ. մայիսի 4-ի թիվ 526-Ն որոշման 1-ին կետի 1-ին ենթակետով հաստատված թիվ 1 հավելվածի 42-րդ կետը՝ հանձնաժողովը մերժեց «Էդվարդ Քոմփյութերս» ՍՊԸ-ի կողմից ներկայացված հայտերը:»:

Խորհրդում նախաձեռնված պաշտոնական ընթացակարգի քննության նպատակով տեղի ունեցած նիստերին մասնակցում էր ՀՀ Ազգային ժողովի ներկայացուցիչ՝ Հովհաննիսյան Ռուզաննան:

3. «Էդվարդ Քոմփյութերս» ՍՊԸ-ի ներկայացրած փաստարկները և դիրքորոշումը.

«Էդվարդ Քոմփյութերս» ՍՊԸ-ն 31.08.2017թ. Խորհրդին ուղղված գրությամբ հայտնել է հետևյալը.

«Գնումների էլեկտրոնային www.armeps.am համակարգի միջոցով մասնակցության հայտ է ներկայացրել ՀՀ Ազգային ժողովի կարիքների համար համակարգչային և պատճենահանման սարքավորումների ձեռքբերման նպատակով 2017թ. հուլիսի 25-ին հայտարարված «ՀՀ ԱԺ-ԳՀԱՊՁԲ-17/1» ծածկագրով ընթացակարգի 2, 4, 5 չափաբաժինների մասով:

Օգոստոսի 3-ին ժամը 17:10-ին ՀՀ Ազգային ժողովը www.armeps.am համակարգի միջոցով grigoryanmeri-88@mail.ru էլեկտրոնային հասցեին ուղղարկել է մրցույթի բացման նիստի թիվ 2 արձանագրությունը, որտեղ 3.3 կետով «Էդվարդ Քոմփյութերս» ՍՊԸ-ին առաջարկվել է շտկել հայտի հավելված 1-ում տեղ գտած անճշտությունները: Սակայն «Էդվարդ

Քոմիյութերս» ՍՊԸ-ն տեխնիկական պատճառներով չի ներկայացրել տեղ գտած անճշտությունների շտկումները: Մրցույթի բացման նիստի թիվ 2 արձանագրությունը եղել է մեր էլ. հասցեի ոչ թե մուտքային թղթապանակ, այլ՝ սպամ, ինչի պատճառով մենք այդ արձանագրությունը տեսել ենք երկու օր անց և չենք կարողացել օրենքով սահմանված ժամկետում ներկայացնել տեղ գտած անճշտությունների շտկումները:

Համաձայն Գնումների մասին ՀՀ օրենքի 34-րդ հոդվածի 1-ին կետի՝ ընթացակարգին ներկայացված հայտերոլմ անհամապատասխանությունների առկայության դեպքում հայտերը գնահատվում են անբավարար և մերժվում: Մեր կողմից ներկայացված հայտը եղել է ընթացակարգի պահանջներին անհամապատասխան և ենթակա է մերժման:»:

Խորհրդում տեղի ունեցած նիստերին մասնակցում էին Ընկերության ներկայացուցիչներ՝ Մերի Գրիգորյանը և Տարոն Քյասինյան:

4. ՍՑ-ԷՍ-2017/35 պաշտոնական ընթացակարգի քննության համար էական նշանակություն ունեցող փաստերը, Խորհրդի հիմնավորումները և եզրահանգումը.

Խորհուրդն ուսումնասիրել է ՀՀ ֆինանսների նախարարության 22.08.2017թ. թիվ 03/26-3/15283-17 գրությունը, ՀՀ Ազգային Ժողովի 17.08.2017թ. թիվ Ա-427 գրությունը, «ՀՀ ԱԺ-ԳՀԱՊՁԲ-17/1» ծածկագրով գնանշման հարցման ընթացակարգի հրավերը (այսուհետ՝ նաև Հրավեր), «ՀՀ ԱԺ-ԳՀԱՊՁԲ-17/1» ծածկագրով գնանշման հարցման ընթացակարգի հանձնաժողովի (այսուհետ՝ նաև Հանձնաժողով) 02.08.2017թ. նիստի N 2 և 08.08.2017թ. նիստի N 3 արձանագրությունները, Ընկերության կողմից 31.08.2017թ. գրությամբ ներկայացված դիրքորոշումը:

ՀՀ Ազգային Ժողովը համակարգչային և պատճենահանման սարքավորումների ձեռքբերման նպատակով կազմակերպել է «ՀՀ ԱԺ-ԳՀԱՊՁԲ-17/1» ծածկագրով գնանշման հարցման ընթացակարգ (այսուհետ՝ նաև ընթացակարգ):

«Էդվարդ Քոմիյութերս» ՍՊԸ-ն ընթացակարգին մասնակցելու նպատակով ներկայացրել է հայտ:

Հանձնաժողովը 02.08.2017թ. ժամը 10:30-ին կայացած նիստի N 2 արձանագրության 3.3 կետով «Էդվարդ Քոմիյութերս» ՍՊԸ-ի հայտի Հավելված 1-ով ներկայացված դիմումում արձանագրել է անհամապատասխանություն հրավերի պահանջներին, այն է՝ նշված հավելվածում բացակայել է Ընկերության իրավաբանական և/կամ գնտվելու վայրի հասցեն և հեռախոսահամարը:

Նույն արձանագրության 3.4 կետով Հանձնաժողովը առաջարկել է Ընկերությանը մեկ աշխատանքային օրվա ընթացքում շտկել նշված անհամապատասխանությունը:

Հանձնաժողովը 08.08.2017թ. ժամը 10:30-ին կայացած նիստի N 3 արձանագրության 1-ին կետով մերժել է «Էդվարդ Քոմփյուրերս» ՍՊԸ-ի կողմից ներկայացրած հայտը՝ նշված անհամապատասխանությունը սահմանված ժամկետում չշտկելու հիմնավորմամբ:

ՀՀ կառավարության 04.05.2017 թվականի N 526-Ն որոշմամբ հաստատված «Գնումների գործընթացի կազմակերպման մասին» կարգի՝

- 2-րդ կետի համաձայն՝ հրավերում և պայմանագրում հիմնական պայմանների ներառման, ինչպես նաև գնումների մասին Հայաստանի Հանրապետության օրենսդրությամբ պատվիրատուների համար սահմանված պահանջների կատարման պատասխանատվությունը կրում է պատվիրատուն:

- 32-րդ կետի 1-ին ենթակետի «ա» պարբերության համաձայն՝ հրավերով նախատեսվում է՝ մասնակիցը հայտով ներկայացնում է՝ գնման ընթացակարգին մասնակցելու գրավոր դիմում՝ նշելով հարկ վճարողի հաշվառման համարը,

Հրավերի 4.3 Մասնակիցը հայտով ներկայացնում է՝

- 1) գնման ընթացակարգին մասնակցելու գրավոր դիմում՝ նշելով հարկ վճարողի հաշվառման համարը և էլեկտրոնային փոստի հասցեն,

«Գնումների մասին» օրենքի 16-րդ հոդվածի 2-րդ մասի 8-րդ կետի համաձայն՝ գնումների գործընթացի կարգավորման և համակարգման աշխատանքների կազմակերպման նպատակով լիազորված մարմինը հաստատում է գնումների գործընթացում օգտագործվող փաստաթղթերի, ներառյալ՝ հրավերի և պայմանագրի օրինակելի ձևերը:

ՀՀ ֆինանսների նախարարի 2017թ. մայիսի 24-ի թիվ 237-Ա հրամանով հաստատված գնանշման հարցման ձևով էլեկտրոնային եղանակով կազմակերպվող բազային միավորի հնգապատիկը գերազանցող գնման հայտարարությունների և հրավերի օրինակելի ձևի հավելված 1-ով սահմանված՝ մասնակցի կողմից ներկայացվող մասնակցության դիմումով նախատեսված են հետևյալ պարտադիր վավերապայմանները՝ մասնակցի անվանումը, պատվիրատուի անվանումը, չափաբաժնի համարը, երկրի անվանումը, հարկ վճարողի հաշվառման համարը, էլեկտրոնային փոստի հասցեն, ղեկավարի պաշտոնը, անունը ազգանունը և ստորագրությունը:

Խորհուրդն արձանագրում է, որ «ՀՀ ԱԺ-ԳՀԱՊԶԲ-17/1» ծածկագրով գնանշման հարցման ընթացակարգի հանձնաժողովի կողմից հրավերի հավելված 1-ով նախատեսվել է ՀՀ ֆինանսների նախարարի 2017թ. մայիսի 24-ի թիվ 237-Ա հրամանով հաստատված

հրավերի օրինակելի ձևի՝ նույն հավելվածով չնախատեսված վավերապայման, այն է՝ իրավաբանական և/կամ գնտվելու վայրի հասցեն և հեռախոսահամարը:

Խորհուրդը գտնում է, որ Հանձնաժողովը, «Էդվարդ Քոմփյութերս» ՍՊԸ-ի հայտը նշված վավերապայմանի չշտկման հիմքով մերժելով՝ խախտել է օրենքի 16-րդ հոդվածի 2-րդ մասի 8-րդ կետով, ինչպես նաև ՀՀ ֆինանսների նախարարի 2017թ. մայիսի 24-ի թիվ 237-Ա հրամանով հաստատված գնանշման հարցման ձևով էլեկտրոնային եղանակով կազմակերպվող բազային միավորի հնգապատիկը գերազանցող գնման հայտարարությունների և հրավերի օրինակելի ձևով սահմանված պահանջները:

Հաշվի առնելով վերոգրյալը՝ Խորհուրդը գտնում է, որ «Էդվարդ Քոմփյութերս» ՍՊԸ-ն գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 22.08.2017թ. թիվ 03/26-3/15283-17 գրությամբ «Էդվարդ Քոմփյութերս» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված պաշտոնական ընթացակարգը մերժել:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

**ՀՀ գնումների բողոքարկման
խորհրդի անդամ՝**



ԷՄԻԼ ՍԱՐԳՍՅԱՆ